

Wendy Maduro Johnson:

“Cosnan ta miho den sociedad pa muhenan cu ta duna pecho, pero mas por wordo haci”

ORANJESTAD - Wendy Maduro Johnson, antes tabata fungi como presidente di fundacion pro lechi mama Aruba. Den un entrevista cu Bon Dia Aruba ta conta tocante dunamento di pecho pa mamanan na Aruba, mamanan soltero y machismo den un sociedad.

Sra. Maduro Johnson, ta conta cu cosnan ta miho den sociedad pa mamanan cu ta duna pecho, pero mas por wordo haci. Segun su persona, e movecion social pa locual ta trata lechi di pecho, den e ultimo temponan a muri hopi.

“Ora mi a haya Dahlia, casi 7 aña pasa, mi tabata dun’e lechi di pecho y mi kier a yuda otro mamanan. Pues e ora m’a uni cu fundacion pro lechi mama. Esaki tabata algo



hopi hopi bon, el a tuma un poco tempo pa cuminsa organisa actividad etc. Despues di un tempo m’a cuminsa bishita otro mamanan, bay bishita nan na cas. Asina m’a conoce hopi mulhe den hopi diferente circunstancia y desde e tempo ey, mi a haya un pasion pa locual ta dunamento di pecho y ‘motherhood’ en general” sra. Maduro Johnson ta comenta. Tin e fundacion pro lechi mama, pero tambe tin un plataforma

ma. E dos cosnan aki ta uni y ta tuma decisionnan hunto tocante e maneho. Pero na 2012, sra. Maduro Johnson a sali na estado di su di dos yiu y el a stop di ta parti di e fundacion, mirando cu ya e no por a comete 100% na e fundacion.

“Ta den un fundacion ta tuma hopi tempo di bo. E tabata un experiencia unico, mi a siña hopi pasobra con cu bay bin, dunamento di pecho

ta algo cu bo no ta scucha hopi di dje. Bo no ta wak e hopi, pero ora bo ta den e mundo ey, bo ta realisa cu falta asina hopi informacion tur caminda. E dokternan, wit gele kruis, etc. E ta miho cu prome, pero ainda falta” sra. Maduro Johnson ta bisa.

Leynan no ta na favor di mama soltero

Segun sra. Maduro Johnson, e sociedad di Aruba ta uno hopi machista. Y hopi ley ta basa riba e echo cu un homber ta cabes di e cas. E ta uza su ehempel, como cu ora el a haya su prome yiu el a duna e mucha su fam, ya e mucha su tata tabata uno cu no tabata responsabel.

Despues di algun luna e tata a lanta un caso contra dje pa “erkenning” di e mucha. “Mi a drenta e corte cu confiansa mi lo gana, mi kiermen e no ta dificil pa wak cu e no tabata tin ningun interes, e tabata djis bringa pa su ego.

Pero nos a bay corte dos bi-aha y e hues a dicidi. E tata a gana e caso y e mucha su fam a wordo cambia. El a gana basa riba echo cu e ley di Aruba ta dicta cu al menos cu e fam di e tata ta trece daño fisico di inmediato na e mucha, no tin ningun prob-



lema. Ainda mi ta rabia pa via di esey, Mi tabata tin un abogado y e hues tambe tabata di acuerdo cu mi. Pero e ta algo cu ta para den ley. Den e sociedad aki, muchanan cu no tin fam di nan tata ta wordo mira manera menos afortuna, mamanan soltero di kende nan yiunan ta carga nan fam ta wordo mira den un luz negativo, manera si nan no tabata suficientemente bon pa e tata reconece e mucha” sra. Maduro ta comenta.

Bon Dia Aruba a puntra sra. Maduro Johnson si e ta pensa cu sociedad ta duna suficiente sosten na mamanan hoben of mama soltero, el a

contesta cu e no ta haya cu nan ta haya suficiente sosten. Sra. Maduro Johnson ta bisa “Nos ta lanta ta pensa un cierto manera, semper bo mester un partner. Ta un mama soltero ta malo, semper mester ta un famia, un figura paterno. Mi a separa di mi prome yiu su tata ora e tabata tin 3 luna di naci.

Pero mi tabata sinti bashi, hende ta pone bo sinti cu bo no ta completo sin un homber. Pero recientemente mi a siña cu e no ta asina, un mama soltero no ta bashi, e no falta nada. Si e kier un pareha esey ta otro cos. Pero un famia no mester un homber aden pa ta completo. Bo por ta completo. Pa via di e percepcionnan aki, mi a tuma hopi mal decision despues.”

Miho parti

Sra. Maduro Johnson ta conta cu e miho parti di ta un mama, ta con hopi el a siña tocante su mes.

E mester a siña haya pasenshi y sinti compasion. E ta conta “Ora bo ta mama, bo no por sinta bisa cu bo no lo haci tal cos, of cu nunca bo lo ta e tipo di mama ey. Pasobra tin un posibilidad cu bo lo caba na haci hopi cos cu bo a bisa cu nunca bo lo haci.” □